

## I. DISPOSICIÓNS XERAIS

### CONSELLERÍA DE SANIDADE

*ORDE do 8 de xullo de 2019 pola que se crea e se regula a composición, funcionamento e organización do Consello Técnico de Atención Primaria.*

O artigo 26 da Lei 8/2008, do 10 de xullo, de saúde de Galicia, prevé que por orde da persoa titular da Consellería de Sanidade se poderán establecer órganos de participación comunitaria a outros niveis territoriais e funcionais do Sistema público de saúde de Galicia, coa finalidade de asesorar os correspondentes órganos directivos e implicar as organizacións sociais e cidadás no obxectivo de acadar maiores niveis de saúde.

Para tal efecto, a persoa titular da Consellería de Sanidade, mediante orde, regulará a composición e establecerá as normas xerais de organización e funcionamento destes órganos.

É unha realidade que o patrón epidemiolóxico da poboación está a cambiar como consecuencia do aumento das enfermidades crónicas e o dito cambio está a orixinar unha maior demanda na utilización dos servizos a que ten que adaptarse o sistema sanitario. A poboación de Galicia atópase entre as máis lonxevas do mundo, cunha esperanza de vida ao nacer superior aos 83 anos e cun 25 % da poboación que supera os 65 anos. Unha situación que, segundo indican as proxeccións, continuará aumentando nos próximos anos de forma moi acusada.

O modelo asistencial tradicional, centrado na resolución das patoloxías agudas, ten por tanto que ir cambiando tamén para adaptarse ás novas necesidades. E tamén a división tradicional en dous niveis asistenciais separados, dado que será necesaria unha visión integradora, novas dinámicas de traballo non soamente entre a atención primaria e a hospitalaria, senón tamén con outros axentes implicados nos coidados de diferentes aspectos como os correspondentes a servizos sociosanitarios, os de saúde pública ou as propias asociacións de pacientes.

A atención primaria debe constituírse no nivel asistencial que lidere a xestión dos procesos de atención ás persoas con enfermidade crónica dentro do sistema sanitario e converterse no seu eixe vertebrador.

O Servizo Galego de Saúde ten iniciado para iso un proceso no cal se tratan de abordar estes retos do futuro e definir as liñas estratéxicas que poidan axudar a que o persoal teña



máis tempo para atender as persoas enfermas, a mellorar a coordinación entre a atención primaria e o hospital, mellorar a formación e a investigación.

Este proceso de definición estratéxica do novo modelo será desenvolvido a través do Consello Técnico de Atención Primaria que, cun carácter permanente, realice funcións en relación cos aspectos científicos, sociais e profesionais no ámbito da atención primaria, desde unha visión multidisciplinar, que se reflecta na súa composición e que poida tratar sobre os programas e medidas que se van desenvolver neste proceso.

O citado artigo 26 da Lei 8/2008, do 10 de xullo, establece para tal efecto que este tipo de órganos poderán incluír, ademais do persoal e dos representantes de equipo directivo que se considere, entre outros, representantes dos colexios profesionais sanitarios, sociedades científicas, asociacións, entidades locais e as persoas consumidoras e usuarias, así como persoas físicas e xurídicas de recoñecido prestixio no campo das ciencias da saúde.

En cumprimento do sinalado, esta orde crea e regula a composición, funcionamento e organización do Consello Técnico de Atención Primaria, dentro dos parámetros normativos antes indicados e como resposta a unha necesidade do propio Sistema público de saúde de Galicia e dos seus profesionais.

Na súa virtude, por proposta da Xerencia do Servizo Galego de Saúde e no uso das competencias atribuídas pola Lei 1/1983, do 22 de febreiro, de normas reguladoras da Xunta e da súa Presidencia,

#### DISPOÑO:

##### Artigo 1. *Obxecto*

Esta orde ten por obxecto a creación e a regulación da composición, funcionamento e organización do Consello Técnico de Atención Primaria como órgano colexiado de asesoramento técnico no ámbito da atención primaria do Servizo Galego de Saúde.

##### Artigo 2. *Funcións do Consello Técnico de Atención Primaria*

1. Ao Consello Técnico de Atención Primaria correspóndenlle as seguintes funcións:

a) Asesorar o Servizo Galego de Saúde nos asuntos do seu ámbito de competencias, especialmente no que se refire á prevención, diagnóstico precoz e mellora da accesibilidade da atención sanitaria, sen prexuízo das competencias que poidan ter outros órganos.



b) Propoñer e elaborar programas de intervención comunitaria para a mellora da saúde da poboación.

c) Informar e asesorar sobre as medidas destinadas á mellora da xestión da demanda no ámbito da atención primaria e a análise da mellora da súa capacidade resolutive e da carteira de servizos.

d) Asesorar sobre aspectos organizativos necesarios para favorecer a continuidade asistencial e a coordinación e comunicación entre os niveis asistenciais de atención primaria e atención hospitalaria.

e) Analizar as liñas de xestión de procesos asistenciais de atención primaria e de propostas de mellora das relacións de atención primaria coa atención hospitalaria.

f) O estudo e a análise de propostas de nova organización da xestión de atención primaria.

g) Asesorar sobre aspectos relacionados coa formación, docencia e investigación no ámbito da atención primaria.

h) Presentar propostas de mellora dos servizos do Servizo Galego de Saúde no ámbito das funcións descritas.

i) Estudar e emitir informe sobre plans, programas ou proxectos que sexan sometidos á súa consideración.

j) A análise e avaliación das necesidades de recursos humanos.

k) A aprobación do seu regulamento interno de funcionamento.

l) Calquera outra que lle sexa atribuída ou encomendada.

2. No desenvolvemento das súas funcións, o Consello integrará a perspectiva de xénero, para o cal se terán en conta as diferenzas que na análise, avaliación e intervención en materia de atención primaria se poidan dar en función do sexo en xeral e en materia de violencia de xénero en particular.



**Artigo 3. Composición**

1. O Consello Técnico de Atención Primaria estará formado por un máximo de 55 persoas de recoñecido prestixio, recoñecemento social e traxectoria profesional acreditada no ámbito sanitario.

2. As persoas integrantes do consello serán nomeadas e cesadas pola persoa titular da Presidencia do Servizo Galego de Saúde, e entre elas, contarase cando menos:

– Cunha vogalía por proposta da Sociedade Española de Médicos de Atención Primaria (Semergen).

– Cunha vogalía por proposta da Sociedade Española de Médicos Generales y de Familia (SEMG).

– Cunha vogalía por proposta da Asociación Galega de Medicina Familiar e Comunitaria (Agamfec).

– Cunha vogalía por proposta da Asociación Galega de Pediatría de Atención Primaria (Agapap).

– Cunha vogalía por proposta da Asociación Galega de Enfermería Familiar e Comunitaria (Agefec).

– Cunha vogalía por proposta da Sociedade Galega de Fisioterapeutas (Sogafi).

– Cunha vogalía por proposta da Asociación Española de Trabajo Social y Salud en Galicia (AETSYS).

– Cunha vogalía por proposta da Asociación de Farmacéuticos de Atención Primaria de Galicia (FAPsGal).

– Cunha vogalía por proposta da Asociación Galega de Médicos de PAC (Agampac).

– Cunha vogalía por proposta da Asociación Galega para a Defensa da Sanidade Pública (AGDSP).

– Cunha vogalía por proposta da Asociación Galega de Matronas (AGAM).



- Cunha vogalía por proposta da Asociación Galega de Enfermaría Pediátrica (AGAEP).
- Cunha vogalía por proposta da Plataforma SOS Sanidade Pública de Galicia.
- Cunha vogalía en representación da categoría de persoal de servizos xerais (PSX) proposta polo Servizo Galego de Saúde.
- Cunha vogalía por proposta de cada unha das organizacións sindicais con representación na mesa sectorial de sanidade.
- Cunha vogalía por proposta da Federación Galega de Municipios e Provincias (Fegamp).
- Con dúas vogalías por proposta das asociacións que forman parte do Consello Asesor de Pacientes do Servizo Galego de Saúde.
- Cunha vogalía por proposta dos colexios oficiais de médicos de Galicia.
- Cunha vogalía por proposta dos colexios oficiais de enfermaría de Galicia.
- Cunha vogalía por proposta dos colexios oficiais de farmacéuticos de Galicia.
- Cunha vogalía por proposta do Colexio Oficial de Fisioterapeutas de Galicia.
- Cunha vogalía por proposta do Colexio Oficial de Traballadores Sociais de Galicia.
- Cunha vogalía por proposta do Consello Galego de Odontólogos e Estomatólogos.
- Cunha vogalía por proposta da consellería con competencias en materia de educación.
- Cunha vogalía por proposta da consellería con competencias en materia de servizos sociais.
- Cunha vogalía de entre os/as profesionais do ámbito do centro directivo con competencias en asistencia sanitaria do Servizo Galego de Saúde.
- Cunha vogalía de entre os/as profesionais do ámbito do centro directivo con competencias en recursos económicos do Servizo Galego de Saúde.



– Cunha vogalía de entre os/as profesionais do ámbito do centro directivo con competencias en Recursos Humanos do Servizo Galego de Saúde.

– Cunha vogalía de entre os/as profesionais do ámbito do centro directivo con competencias en Tecnoloxías da Información da Consellería de Sanidade

– Cunha vogalía de entre os/as profesionais do ámbito do centro directivo con competencias en Saúde Pública da Consellería de Sanidade

– Cunha vogalía de entre os/as profesionais do ámbito do centro directivo con competencias en Formación do Servizo Galego de Saúde.

– Cunha vogalía por proposta da Fundación Pública Urxencias Sanitarias de Galicia-061.

3. O nomeamento das persoas integrantes do consello terá unha duración de 3 anos e poderá ser renovado sucesivamente por outros períodos de igual duración.

4. Na composición do Consello procurarase unha composición paritaria entre homes e mulleres.

5. Cada institución ou órgano representado poderá propoñer unha persoa suplente para o caso de ausencia, vacante ou enfermidade.

#### Artigo 4. *Organización*

1. O Consello Técnico de Atención Primaria terá a seguinte organización: Presidencia, Vicepresidencia, Secretaría e vogalías.

2. As persoas titulares da Presidencia e da Vicepresidencia do consello serán designadas pola persoa titular da Presidencia do Servizo Galego de Saúde de entre as persoas integrantes do consello.

3. A Secretaría do consello será asumida por unha persoa adscrita ao Servizo Galego de Saúde e designada para tal efecto pola persoa titular da Presidencia do Servizo Galego de Saúde.



**Artigo 5. Funcións da Presidencia do Consello Técnico de Atención Primaria**

Corresponde á persoa que exerza a Presidencia de consello a realización das seguintes funcións:

- a) Exercer a representación do consello.
- b) Manter a continuidade do consello, coordinando as actividades deste e executando os acordos que se adopten.
- c) Acordar a convocatoria das reunións ordinarias e extraordinarias.
- d) Dirimir co seu voto os empates para os efectos de adopción de acordos.
- e) Visar as actas e certificacións de acordos adoptados polo consello.
- f) Solicitar, en nome do Consello, a colaboración de institucións, autoridades, organismos, entidades, asociacións ou particulares, así como invitar a participar no pleno ou nas comisións que, se é o caso, se poidan crear, a expertos de recoñecida competencia nos asuntos de que se trate.

- g) Outras funcións que lle poidan ser atribuídas.

**Artigo 6. Funcións da Vicepresidencia do Consello Técnico de Atención Primaria**

Corresponderá á Vicepresidencia a realización das seguintes funcións:

- a) Asumir a Presidencia do consello nos casos de ausencia, vacante ou enfermidade da persoa titular desta.
- b) Participar nas reunións con voz e voto.
- c) Aqueloutras funcións que expresamente lle sexan encomendadas pola Presidencia ou polo Pleno.

**Artigo 7. Funcións da Secretaría do Consello Técnico de Atención Primaria**

A persoa responsable da Secretaría terá as seguintes funcións:

- a) Asistir ás sesións con voz e sen voto.



b) Efectuar a convocatoria das sesións seguindo as instrucións da Presidencia e realizar as notificacións ás persoas integrantes do consello.

c) Preparar o despacho dos asuntos, redactar e autorizar as actas das sesións, así como realizar o arquivamento dos documentos do consello.

d) Expedir as certificacións das consultas, ditames ou acordos aprobados.

e) Aqueloutras funcións inherentes á súa condición.

#### Artigo 8. *Funcións das vogalías*

As persoas que exerzan as vogalías terán as seguintes funcións:

a) Participar nos debates das sesións e emitir o seu voto, así como expresar o sentido deste e os seus motivos, e formular votos particulares.

b) Presentar propostas de mellora dos servizos, dentro do seu ámbito de competencias.

c) Formular rogos e preguntas.

d) Obter a información precisa para cumprir as funcións asignadas.

e) Outras funcións inherentes á súa representación.

#### Artigo 9. *Réxime de funcionamento*

1. O Consello Técnico de Atención Primaria funcionará en pleno e poderá crear comisións sectoriais, se se considera necesario.

2. Para a válida constitución do consello para os efectos da realización de sesións, deliberacións e toma de acordos, requirirase a presenza da persoa que exerza a presidencia e da persoa que exerza a secretaría, ou das persoas que as substitúan, e da metade, polo menos, das persoas integrantes, presentes ou representadas.

3. O Consello poderase constituír e convocar e poderá realizar as súas sesións, adoptar acordos e remitir actas tanto de forma presencial como a distancia.





Non obstante, agás que non sexa posible, as convocatorias serán remitidas ás persoas integrantes do órgano colexiado a través de medios electrónicos, segundo o disposto no artigo 17 da Lei 40/2015, do 1 de outubro, e no artigo 21 da Lei 16/2010, do 17 de decembro.

4. O Pleno do Consello reunirse polo menos dúas veces ao ano, ou por requirimento da Presidencia ou dun terzo das persoas que o integran.

5. As comisións sectoriais que se poidan crear, cuxa composición será acordada polo Pleno, reuniranse cando así sexa necesario para o desenvolvemento das tarefas específicas que lles sexan encomendadas. A organización e o funcionamento destas comisións rexeranse polas normas que se establezan no Regulamento de réxime interno.

6. Na composición das comisións sectoriais procurárase unha composición paritaria entre homes e mulleres.

#### Artigo 10. *Convocatorias*

1. A convocatoria das reunións do Pleno será realizada pola Secretaría de acordo coa orde da Presidencia e cos asuntos que esta indique. As comisións sectoriais terán o seu propio réxime de convocatorias de conformidade co acordado polo Pleno.

2. Ao escrito de convocatoria, que incluírá a orde do día, deberá unirse a documentación específica sobre os asuntos que se van tratar e remitirse ás persoas integrantes do consello cunha antelación mínima de corenta e oito horas. A convocatoria realizarase por medios electrónicos. Cando a documentación dos asuntos que se traten sexa considerable e dificulte a súa remisión por medios electrónicos, poderase habilitar un acceso a esta para as persoas integrantes do consello.

#### Artigo 11. *Constitución*

1. O Pleno do Consello Técnico de Atención Primaria considerarase constituído coa presenza das persoas que exerzan a presidencia e a secretaría e, polo menos, a metade das persoas que exerzan as vogalías.

2. Poderán asistir ás reunións, con voz e sen voto, aquelas persoas que sexan invitadas pola Presidencia en calidade de expertas en relación coas materias incluídas na orde do día.



**Artigo 12. Réxime de acordos**

1. Os acordos do Consello Técnico de Atención Primaria adoptaranse por maioría simple.

2. De cada sesión que se realice redactarase a acta correspondente en que consten os acordos adoptados, que se poderán motivar, se así o solicitan as persoas integrantes do consello.

**Artigo 13. Recursos materiais e humanos**

O Servizo Galego de Saúde prestará o apoio administrativo, de persoal e material que sexa preciso para que o Consello realice as funcións atribuídas.

**Artigo 14. Réxime xurídico**

Ao Consello seralle de aplicación o previsto nos artigos 15 a 22 da Lei 40/2015, do 1 de outubro, de réxime xurídico do sector público, e nos artigos 14 a 22 da Lei 16/2010, do 17 de decembro, de organización e funcionamento da Administración xeral e do sector público autonómico de Galicia, respecto do funcionamento dos órganos colexiados, así como o previsto no seu regulamento interno de funcionamento.

**Disposición adicional única. Gasto público**

A creación do Consello Técnico de Atención Primaria non supón incremento do gasto público. A pertenza a este órgano considerarase de carácter honorario e a asistencia ás reunións do consello non terá carácter retribuído.

**Disposición derradeira única. Entrada en vigor**

Esta orde entrará en vigor o día seguinte ao da súa publicación no *Diario Oficial de Galicia*.

Santiago de Compostela, 8 de xullo de 2019

Jesús Vázquez Almuíña  
Conselleiro de Sanidade

